



Broj: 01,03,03/11-05-1-214/13

Sarajevo: 16.10.2013.

IZVJEŠTAJ

**O ZVANIČNOJ POSJETI PREDSJEDAVALJUĆEG PREDSTAVNIČKOG DOMA
PSBiH DENISA BEĆIROVIĆA I POSLANIKA U PREDSTAVNIČKOM DOMU
PSBiH DRAGANA VRANKIĆA GRČKOJ**

8. - 10. OKTOBAR 2013.

Na poziv predsjednika Parlamenta Grčke, predsjedavajući Predstavničkog doma Parlamentarne skupštine BiH Denis Bećirović i poslanik u Predstavničkom domu PSBiH Dragan Vrankić boravili su u zvaničnoj radnoj posjeti Grčkoj. U pratnji delegacije, bili su: Jelena Rajaković, šefica Odjela za bilateralne odnose, Damir Porobić, šef Kabineta predsjedavajućeg Predstavničkog doma, i Dubravka Ištuk-Pavlović, prevodilac.

Tokom sastanka s predsjednikom Parlamenta Grčke Evangelosom Meimarakisom predsjedavajući Bećirović govorio je o ključnim vanjskopolitičkim ciljevima Bosne i Hercegovine. On je istakao čvrstu opredijeljenost Bosne i Hercegovine za članstvo u Evropskoj uniji i NATO-u, kao i za dobru regionalnu saradnju. Za Bosnu i Hercegovinu je posebno važna podrška Grčke navedenim ciljevima s obzirom na činjenicu da će Grčka preuzeti predsjedavanje Evropskom unijom u prvoj polovini 2014. godine, te da će jedan od njenih glavnih prioriteta biti puna integracija zemalja zapadnog Balkana u EU. Predsjedavajući Bećirović istakao je da ekonomska saradnja Grčke i Bosne i Hercegovine treba biti intenzivirana. Kao oblasti u kojima postoje odlični uslovi za povezivanje naveo je energetiku, saobraćajnu infrastrukturu, turizam, poljoprivredu, drvnu, mašinsku te elektroindustriju i građevinarstvo. Govoreći o modalitetima povećanja trgovinske razmjene između Bosne i Hercegovine i Grčke, Bećirović je istakao da je za Bosnu i Hercegovinu imperativ smanjenje trgovinskog deficita s Grčkom, te da Sporazum o ekonomskoj i tehnološkoj saradnji između Bosne i Hercegovine i Grčke omogućava proširenje ekonomske saradnje u svim oblastima značajnim za ekonomski i društveni razvoj dvije zemlje. On je istakao ulogu Zajedničkog komiteta za ekonomsku i tehnološku saradnju između Bosne i Hercegovine i Grčke u realizaciji konkretnih pitanja bilateralne ekonomske saradnje, te naglasio da je potrebno intenzivirati sjednice Zajedničkog komiteta. Bećirović je predložio razmatranje mogućnosti uvođenja direktne avionske linije između Sarajeva i Atine, što bi značajno doprinijelo unapređenju razvoja turizma, trgovinskih i ukupnih ekonomskih odnosa. Osim navedenog, ukazao je i na značaj saradnje univerziteta iz Bosne i Hercegovine i Grčke, s ciljem provođenja ciljeva Bolonjske deklaracije i prilagođavanja općim razvojnim ciljevima Evropskog prostora visokog obrazovanja.

Predsjednik Parlamenta Grčke Evangelos Meimarakis istakao je da je sigurnost i stabilnost regiona JIE u interesu Grčke, te da ona pomaže i podržava ulazak zemalja zapadnog Balkana u Evropsku uniju. On je naveo i veliku zainteresiranost Grčke za političku i ekonomsku saradnju s Bosnom i Hercegovinom, što je pokazano i kroz političku i donatorsku pomoć našoj zemlji.

Predsjednik Parlamenta Republike Grčke Evangelos Meimarakis odlikovao je predsjedavajućeg Predstavničkog doma Parlamentarne skupštine BiH Denisa Bećirovića najvišim priznanjem Parlamenta Grčke - Zlatnom medaljom Helenskog parlamenta. Svečana ceremonija održana je u Parlamentu Republike Grčke u Atini, a prilikom uručivanja odlikovanja Evangelos Meimarakis zahvalio se predsjedavajućem Bećiroviću na doprinosu u jačanju prijateljskih odnosa između dvije države.

Delegacija Parlamentarne skupštine BiH susrela se i s članovima Grupe prijateljstva Grčke i Bosne i Hercegovine. Tokom susreta zaključeno je kako Bosna i Hercegovina i Grčka imaju dobre i prijateljske političke odnose, te da postoje dobri preduslovi za dalji i snažniji razvoj odnosa na ekonomskom, kulturnom, naučnom, te obrazovnom planu. Predsjedavajući Bećirović naglasio je da se interesi obje zemlje podudaraju u mnogim oblastima, posebno vanjskopolitički ciljevi Bosne i Hercegovine da bude punopravna članica Evropske unije i NATO-a i želja Grčke da zemlje regiona jugoistočne Evrope postanu članice ovih organizacija. Bećirović je istakao da Parlamentarna skupština BiH i Parlament Grčke moraju biti u funkciji ekonomije i predložio da predstavnici dva parlamenta zatraže od organa izvršne vlasti da u što kraćem roku potpišu nove sporazume i protokole koji treba da ojačaju ekonomske veze između dvije države. Tom prilikom Bećirović je predložio da se što prije usaglase i potpišu: Protokol između Vijeća ministara BiH i Vlade Grčke o provođenju Sporazuma između BiH i EZ o readmisiji lica koja borave bez dozvole, Sporazum o pomorskom saobraćaju između Vijeća ministara BiH i Vlade Grčke, Sporazum između Vijeća ministara BiH i Vlade Grčke o zaštiti razmijenjenih tajnih podataka, Protokol o saradnji između Ministarstva pravde BiH i Ministarstva pravde Grčke te Sporazum o socijalnom osiguranju.

šefica
Odjela za bilateralne odnose
Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol

Kopija: Ministarstvo vanjskih poslova BiH